



DET KONGELIGE  
KOMMUNAL- OG DISTRIKTSDEPARTEMENT

Statsråden

Stortingets kommunal- og forvaltningskomite  
0026 OSLO

Deres ref

Vår ref

Dato

23/2108-3

26. april 2023

**Dokument 8:212 S (2022-2023) Representantforslag frå  
stortingsrepresentantane Alfred Jens Bjørlo, André N. Skjelstad og  
Ingvild Wetrhus Thorsvik om fleire staduavhengige jobbar i  
statsforvaltinga**

Eg viser til brev frå kommunal- og forvaltningskomiteen datert 13. april 2023. Komiteen ber om mi vurdering av representantforslag 8:212 S (2022–2023) «Representantforslag frå stortingsrepresentantane Alfred Jens Bjørlo, André N. Skjelstad og Ingvild Wetrhus Thorsvik om fleire staduavhengige jobbar i statsforvaltinga».

Representantane fremjar følgjande forslag:

1. Stortinget ber regjeringa setje konkrete måltal på kor stor del av stillingane i nasjonale statlege etatar/forvaltningsorgan som skal vere staduavhengige med høve til lokalisering i jobbfellesskap i bu- og arbeidsmarknadsregionar i Distrikts-Noreg.
2. Stortinget ber regjeringa sørge for at det blir etablert gode modellar for og kunnskapsdeling mellom ulike statlege etatar om desentralisert jobbstruktur i ein ny digital kvardag, og at det blir stilt tydelege forventningar til alle statsetatar om å legge til rette for dette.
3. Stortinget ber regjeringa sørge for at det i samarbeid med kommunar/regionar blir lagt til rette for at det er tilgjengeleg eigna lokale/fasilitetar for å ha desentraliserte, fleksible statlege arbeidsplassar i alle bu- og arbeidsmarknadsregionar i Distrikts-Noreg.

***Til forslag 1:***

***Stortinget ber regjeringa setje konkrete måltal på kor stor del av stillingane i nasjonale statlege etatar/forvaltningsorgan som skal vere staduavhengige med høve til lokalisering i jobbfellesskap i bu- og arbeidsmarknadsregionar i Distrikts-Noreg.***

Regjeringa har høge ambisjonar for ein aktiv distriktpolitikk, og som også inneber ei satsing på desentralisert arbeid som eit verkemiddel for å bidra til fleire kompetansearbeidsplassar i distrikta. Difor har vi lagt inn ei føring i tildelingsbrevane til alle statlege verksemder i 2023, at dei skal vurdere kva mogelegheit dei har for auka bruk av desentralisert arbeid, med det formål å oppnå meir desentralisering av statlege arbeidsplassar og styrkje lokale fagmiljø, som kan gje distriktpolitisk vinst. I føringa blir det peikt på at slikt desentralisert arbeid fortrinnsvis bør bli kombinert med høve til å vere knytt til eit kontorfellesskap der det er tilgjengeleg.

Alle statlege verksemder skal i årsrapporten gje si vurdering av moglegheitene for desentralisert arbeid, omfang og bruk av desentralisert arbeid i verksemda og erfaringane med dette. Dersom verksemda ikkje har hatt auke i desentralisert arbeid eller dersom bruken har gått ned, skal det særskilt gjerast greie for årsakene til dette.

Regjeringa meiner at kvar einskild statleg verksemd sjølv er nærast til å vurdere korleis ein best kan nå målsetjinga om auka tilrettelegging for desentralisert arbeid, innanfor mål, rammer og samfunnsoppdraga for verksemda. Dette er også i tråd med tillitsreforma.

Det er den einskilde verksemda som har dei beste føresetnadane til å kunne vurdere i kva omfang det er formålstenleg å leggje til rette for desentralisert arbeid i si verksemd, kva funksjonar og arbeidsoppgåver som kan utførast staduavhengig, og korleis det bør leggjast til rette for dei som jobbar desentralisert. Statlege verksemder er ulike, både når det gjeld storleik og kva oppgåver verksemda skal utføre. I tillegg er verksemdene ulikt organisert og geografisk plassert. Nokre verksemder vil kunne ha stort potensial for bruk av desentralisert arbeid, medan det for andre verksemder vil vere meir krevjande. Ut frå dette framstår det ikkje som føremålstenleg å stille detaljerte krav til talet på stillingar som skal ha status som desentralisert arbeid i kvar einskilde verksemd.

### ***Til forslag 2:***

***Stortinget ber regjeringa sørge for at det blir etablert gode modellar for og kunnskapsdeling mellom ulike statlege etatar om desentralisert jobbstruktur i ein ny digital kvardag, og at det blir stilt tydelege forventingar til alle statsetatar om å legge til rette for dette.***

Kommunal- og distriktsdepartementet (KDD) har utarbeidd Rundskriv H-1/23 som orienterer nærare om fellesføringa, og departementet svarer på dei spørsmål som kjem frå etatane.

Arbeidet med fellesføringa skal inngå som ein del av styringsdialogen mellom departement og den einskilde verksemda. Departementa bør også legge til rette for erfaringsutveksling mellom sine underliggande verksemder, mellom anna ved å vidareformidle gode døme.

KDD har utarbeidd ein arbeidsrettsleg rettleiar om desentralisert arbeid i staten. Denne er meint som eit praktisk arbeidsrettsleg verktøy for leiinga i verksemder som har tilsette som jobbar desentralisert eller som jobbar med å leggje til rette for desentralisert arbeid. Rettleiaren har vore på høyring hos hovudsamanslutningane i staten. KDD har fått gode

innspel, og har oppdatert rettleiaren på bakgrunn av desse. KDD tek sikte på å publisere rettleiaren om kort tid.

I tråd med fellesføringa, skal alle statlege verksemder i årsrapporten for 2023 gje si vurdering av mogelegheitene for desentralisert arbeid, omfang og bruk av desentralisert arbeid i verksemda og erfaringane med dette. Dersom verksemda ikkje har hatt auke i desentralisert arbeid eller dersom bruken har gått ned, skal det særskilt gjerast greie for årsakene til dette. Departementa skal samanfatte rapportane frå sine verksemder. KDD skal på grunnlag av desse gjere ei samla vurdering av erfaringar med desentralisert arbeid i statlege verksemder, og vurdere vidare arbeid på feltet.

Tilrettelegging for erfaringsutveksling mellom departementa og mellom statlege verksemder om korleis leggje til rette for desentralisert arbeid, er eit viktig ledd i å auke omfanget av desentralisert arbeid i staten. Rapporteringa frå verksemdene på fellesføringa vil gje oss eit godt utgangspunkt for å få fram gode døme på korleis tilrettelegging kan gjerast, og også kva utfordringar og barrierar verksemder møter på i dette arbeidet. Dette er noko regjeringa allereie jobbar med og som vi vil jobbe vidare med framover.

### ***Til forslag 3:***

***Stortinget ber regjeringa sørge for at det i samarbeid med kommunar/regionar blir lagt til rette for at det er tilgjengeleg eigna lokale/fasilitetar for å ha desentraliserte, fleksible statlege arbeidsplassar i alle bu- og arbeidsmarknadsregionar i Distrikts-Noreg.***

Mange kommunar har stort engasjement for desentralisert arbeid, og mange stader legg kommunen allereie i dag til rette for kontorfellesskap der òg tilsette i staten kan bli invitert inn. Dette er noko som regjeringa er svært positiv til og som eg vil oppmode fleire kommunar om å vurdere. Det er eit godt grunnlag for samarbeid og kan bidra til å styrke kompetansmiljø lokalt. Det er den enkelte kommune som best kjenner sitt område, eksisterande arbeidsplassar og lokale, og potensiale og behov for nye lokale/fasilitetar.

Eg er óg opptatt av at statlege verksemder skal kunne legge til rette for kontorfellesskap der andre statstilsette kan bli invitert inn. Statlege verksemder bør undersøke om det er ledige statlege lokale som kan nyttast, t.d. eit ledig kontor hos ei statleg verksemd. Databasen *Statens lokaler* kan vere eit nyttig verktøy for å identifisere lokale for arbeidstakarar som jobbar desentralisert. Databasen inneheld ei oversikt over lokale som staten eig eller leiger, inkludert ei oversikt over ledige statlege lokale. Dersom staten skal nytte andre lokale, må det vere grunna i eit konkret behov på ein bestemt stad. For å sikre det mest gunstige leigealternativet for staten, må det innhenta fleire tilbod på den aktuelle staden. *Instruks om håndtering av bygge- og leiesaker i statlig sivil sektor* dannar rammeverket for å skaffe lokale i staten. Departementa er ansvarlege for at lokale disponerte av underliggende verksemder er rasjonelt utnytta og at relevante forhold er tilstrekkeleg utgreidde før verksemda anskaffar lokale.

Med helsing

A handwritten signature in blue ink that reads "Sigbjørn Gjelsvik". The signature is written in a cursive style with a blue color.

Sigbjørn Gjelsvik